

Den cuadro di Dia Internacional di Derecho di Auto

Lo reforsa ley di derecho di autor cu boet pisa y prizon

ORANJESTAD – Awe ta wordo conmemora Dia Internacional di Derecho di Autor. Director di Oficina di Propiedad Intelectual, sr. Gos Oduber a declara na Bon Dia Aruba cu e dia aki ta hopi importante pa reconoce y duna balor y respet na e obranan di autornan den tur disciplina ya sea musical, literario, artistico, ciencia, etc...

El a indica cu nan ta hinca hopi tempo pa crea cosnan bunita pa nos por admira tur dia den nos bida, y duna nos importancia di nos bida. “Hopi biaha nos por ripara cu no tur momento nos ta duna reconocimiento na esaki”, el a bisa. Pero no solamente ta e hecho cu nos no ta reconoce e talento y contribucion di e autornan, sino cu hasta nan derechonan di autor ta wordo



viola.

Proyecto di ley

Sr. Oduber a bisa cu su oficina a traha riba un proyecto di ley pa reforsa e derechonan di autor y castiga di forma ehemplar esun cu ta viola e ley aki. E ley aki ta aumenta e castigo den forma di boet

ariba 10 mil florin of eventualmente castigo di prizon tambe. Esaki ta un forma pa traha preventivo –segun sr. Oduber– ya cu un castigo asina pisa sigur e hende ta abstene di viola e ley aki. Actualmente e ley ta na departamentu huridico pa su studio siguiendo e proceso normal pa wordo trata despues den parlamento.

Oficina di Derecho Intelectual tin 28 aña di existencia y nan ta trahando pa salvaguardia e derecho di nos autornan. Sr. Oduber a trece dilanti cu preocupacion cu si den momento cu nos autornan ta fada, ya cu hendenan ta haciendo uzo di nan obra sin permiso, e tendencia ta cu nan ta stop di crea. Esaki ta nifica un impacto pa arte no solamente local sino di mundo, y no ta

local cu nos ta desea.

E oficina aki ta purba di duna conseho na tur esunnan activo riba tereno di propiedad intelectual, special informacion riba derecho y obligacion di e autornan. E ultimo añanan e autornan a bira mas consciente di registra nan obranan cerca e oficina aki. No solamente esaki ta sosode riba tereno di derecho di autor sino di marca y di invento (patent). Esunnan cu mas tanto ta bishita e oficina aki ta e persona cu ta bin registra un marca y esunnan di derecho di autor.

E ta observa cu tin un crecimiento den e cantidad di autornan di Aruba, mas hendenan ta creando nan obra ya sea literario, musical, artistico... Sr. Oduber a expresa su satisfaccion ya cu e hecho aki ta refleha cu mas autornan ta birando consciente di e importancia di registra nan obra.

Pirateria

E violacion di ley di derecho di autor ta sosode di copia nan arte y te hasta reproduci esaki sin permiso di e autor y menos duna reconocimiento

na dje. Te hasta tin hende cu ta gewoon copy-paste of reproduci un producto sin autorisacion, un fenomeno conoci como “pirateria”, y ademas gana placa cu ne.

El a haci un peticion na comunidad henter pa mantene e respet pa nos autornan y di no “horta nan obranan” of haci uzo sin nan permiso. E ta sinti cu di un banda e fenomeno aki a mengua un poco danki na sistemanan moderno cu a wordo introduci cu ta haci cu hendenan cu tin mal intencion di piratia un obra ta pens’e por lo menos dos biaha.

Sr. Oduber a haci un suplica na henter pueblo di Aruba y di henter mundo, ya cu awe ta un dia internacional, pa duna reconocimiento y respet necesario na nos autornan den diferente tereno creativo pa nan obranan.

Na final y como reflexion riba Dia Internacional di Derecho di Autor, sr. Oduber su mensahe textual ta: “Ban duna reconocimiento na nos artistanan y autornan, ban respet nan obra...” □